

Umsögn Sambands íslenskra sparisjóða

um drög að frumvarpi til laga um skilameðferð lánastofnana og verðbréfafyrirtækja

Samband íslenskra sparisjóða fagnar fram komnum drögum að frumvarpi og lýsir stuðningi við meginsjónarmið þeirra.

Breyting á iðgjaldagrunni til samræmis við EU reglur lækkar iðgjöld verulega og eru samanlögð iðgjöld til Innstæðutryggingarsjóðs og Skilasjóðs, nú um 0,15% af tryggðum innstæðum, sambærileg við gjöld nágrannaþjóða. (0,10% í Danmörku, 0,14% í Svíþjóð og 0,16% í Finnlandi, í öllum löndunum greiða smærri fjármálafyrirtæki minna en þau stærri).

Til greina hefði komið að fylgja fordæmi Dana og hætta gjaldtöku til Tryggingarsjóðs á meðan Skilasjóður er byggður upp, en sú leið sem valin er a.m.k. næstu tvö ár skilar svipaðri niðurstöðu. Þannig virðist áformuð árleg færsla úr Tryggingarsjóði nálægt árlegri innheimtu til sjóðsins og skipting greiðslna svipuð þeirri skiptingu sem verða myndi við innleiðingu ESB reglna um innheimtu til Skilasjóðs.

Ætla má að hlutfallslega góð eignastaða Tryggingarsjóðs haldist næstu ár þrátt fyrir litlar inngreiðslur umfram færslur til Skilasjóðs því ávöxtun sjóðsins undanfarin ár hefur nær viðhaldið hlutfallslegri stærð hans. Auk þess er eftir að ákvarða skynsamleg hlutföll sjóðasöfnunar og lánsheimilda Tryggingarsjóðs.

Fyrirliggjandi frumvarpsdrög gefa litlar vísbendingar um hver verði MREL krafa smærri fjármálafyrirtækja. Æskilegt virðist að löggjafinn gefi nánari skilgreiningu á þeim aðferðum sem beitt verður við ákvörðun þeirra krafna, t.d. með vísan í ESB reglur um hóflegar kröfur til smærri fjármálafyrirtækja.

Í umfjöllun um 5. mgr 82. greinar frumvarpsdraganna segir: *Þar að auki verður að líta til þess hverjir hafa fjármagnað sjóðinn en yfir 90% af eignum hans má rekja til greiðslna kerfislega mikilvægra fjármálafyrirtækja.* Þessi setning orkar tvímælis. Tryggingarsjóður nú samanstendur af A deild sem innheimt hefur verið í frá 2011 og B deild sem eru eftirstöðvar eldri tryggingarsjóðs. Eignir B deildar um 5,4 milljarðar voru færðar í sameiginleg innstæðudeild sjóðsins á árinu 2017. Hafið er yfir vafa að yfir 90% af greiðslum til A deildar hafa komið frá kerfislega mikilvægum fjármálafyrirtækjum. B deild sjóðsins nam um 24,3 milljörðum á árinu 2015 áður en greiddar voru út með samkomulagi 20 milljarða upp í kröfur vegna kerfislega mikilvægra fjármálafyrirtækja. Innstæður hjá smærri fjármálafyrirtækjum voru á árabílinu 1998 – 2004 nálægt 23% heildarinnstæðna og má því áætla að um 5 milljarða af eignum B-deildar fyrir útgreiðslur megi rekja til smærri fjármálafyrirtækja, sem er nálægt þeirri upphæð sem eftir stóð í B deild þegar hún var færð yfir. Sé tekið tillit til útgreiðslna úr Tryggingarsjóði vegna kerfislega mikilvægra fjármálafyrirtækja má halda því fram **að yfir 20%** af núverandi eignum sjóðsins megi rekja til smærri fjármálafyrirtækja.